



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

29.06.2022թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի
թիվ ՍՑ-ՆԳ-2022/218

Հայաստանի Հանրապետության գնումների հետ կապված բողոքներ քննող անձը՝ ի
դեմս Գրիգոր Ներսիսյանի,

Մասնակցությամբ՝

«ԲԻ ԷԼ» ՍՊԸ-ի տնօրեն Բ. Լևոնյանի (պետական գրանցման համար՝ 52.110.880920),

«ԲԻ ԷԼ» ՍՊԸ-ի ներկայացուցիչ՝ Ա. Թաշչյանի (լիազորագիր՝ տրված 03.06.2022թ.),

ուսումնասիրելով Հայաստանի Հանրապետության ֆինանսների նախարարության
31.05.2022թ. թիվ 26/26-1/9987-2022 գրությամբ «ԲԻ ԷԼ» ՍՊԸ-ին գնումների
գործընթացին մասնակցելու իրավունք չունեցող մասնակիցների ցուցակում ներառելու
նպատակով նախաձեռնված ընթացակարգով ներկայացված հիմքերը, պարզեցի
հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, ՀՀ պաշտպանության նախարարության
(հետայսու նաև՝ Պատվիրատու) 30.05.2022թ. թիվ ՊՆ/02/2575-2022 գրության հիման

վրա, 31.05.2022թ. թիվ 26/26-1/9987-2022 գրությամբ նախաձեռնել է «ԲԻ ԷԼ» ՍՊԸ-ին (հետայսու նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

2. «ԲԻ ԷԼ» ՍՊԸ-ի կողմից ներկայացված փաստարկները և դիրքորոշումը.

«ԲԻ ԷԼ» ՍՊԸ-ն, ՀՀ գնումների հետ կապված բողոքներ քննող անձին ուղղված գրությամբ, հայտնել է հետևյալը.

«ՍՅ-ՆԳ-2022/218 ծածկագրով ընթացակարգի հետ կապված հայտնում ենք Ձեզ, որ «ԲԻ ԷԼ» ՍՊ Ընկերությունը /այսուհետ՝ Մասնակից/ մասնակցել է ՀՀ պաշտպանության նախարարության (այսուհետ՝ Պատվիրատու) կողմից հայտարարած «ՀՀ ՊՆ-ԳՀԱՇՁԲ-22-8/1» ծածկագրով գնման ընթացակարգին: Հայտերի բացման օրը՝ 17.05.2022թ, «ՀՀ ՊՆ-ԳՀԱՇՁԲ-22-8/1» ծածկագրով գնման ընթացակարգի գնահատող հանձնաժողովը չի իրականացրել սույն ընթացակարգի հրավերի 1-ին մասի 8.1 կետով սահմանված գործառույթները, ինչպես նաև Պատվիրատուի կողմից չի իրականացվել «Գնումների մասին» ՀՀ օրենսդրության համապատասխան հրապարակումները՝ հայտի բացման արձանագրությունը: Հետևաբար Մասնակիցը չէր կարող տեղյակ լինել հայտերի գնահատման նիստի օրվա և ժամի մասին:

2022 թվականի մայիսի 24-ին ժամը 16:25-ին armeps համակարգի ոչ ավտոմատ ծանուցումով «ԲԻ ԷԼ» ՍՊ Ընկերության՝ tender.22.at@gmail.com էլ. հասցեին ներկայացվել է անհամապատասխանության շտկման ծանուցում /ֆայլը կցվում է/, որը «ԲԻ ԷԼ» ՍՊ Ընկերության համապատասխան փաստաթղթերը ներկայացնող մասնագետի՝ Անի Թաշչյանի անաշխատունակության մեջ գտնվելու հանգամանքով պայմանավորված /անաշխատունակության թերթիկը կցվում է/ ներկայացվել են սահմանված ժամկետից ուշ՝ 26.05.2022թ. ժամը 13:18-ին, շտկված փաստաթղթերի հետ միաժամանակ ներկայացվել է նաև քաղվածք մեծահասակի ամբուլատոր բժշկական քարտից: Նույն օրը ժամը 13:38 ոչ ավտոմատ ծանուցումով armeps համակարգի կողմից ստացել ենք մերժման ծանուցում և նույն օրը տեղեկագրում հրապարակվել է գնահատող հանձնաժողովի թիվ 3 արձանագրությունը որում կրկին ներկայացված չի եղել կասեցումից հետո հանձնաժողովի նիստի անցկացման ժամանակացույցը: Գնահատող հանձնաժողովի քարտուղարի կողմից Մասնակցին հետադարձ նամակով չի ներկայացվել փաստաթղթերի ստացման հավաստում՝ դրանց ընդունելու կամ մերժելու հիմքերի վերաբերյալ:

Միաժամանակ հայտնում եմ, որ ընթացակարգի գնահատող հանձնաժողովի քարտուղարի կողմից չի պահպանվել նաև ՀՀ կառավարության 06.04.2017թ. N 386-Ն որոշմամբ հաստատված էլեկտրոնային ձևով գնումների կատարման կարգի 19-րդ կետով սահմանված ժամկետը՝ այն է գնահատող հանձնաժողովի քարտուղարը ընտրված մասնակցին որոշելու նիստի ավարտին հաջորդող աշխատանքային օրն է համակարգում նշում ընթացակարգի բավարար գնահատված մասնակիցներին՝ նրանց դասակարգելով ըստ գնահատման արդյունքների և գնային առաջարկների և համակարգի միջոցով ընթացակարգի մասնակիցների էլեկտրոնային փոստին ուղարկում գնահատման արդյունքների մասին հանձնաժողովի նիստի արձանագրությունը /EvaluationReport_user_/. Վերոնշյալ գործառույթները քարտուղարը իրականացրել է ընտրված մասնակցին որոշելու նիստի օրը/ լուսապատճենը կցվում է/:

Ելնելով վերոգյալ հանգամանքներից փաստում եմք, որ «ԲԻ ԷԼ» ՍՊ ընկերությունը չի հրաժարվել գնման ընթացակարգի հետագա մասնակցությունից, քանի որ համակարգում կցված է եղել կանխիկ փողի ձևով ներկայացված հայտի ապահովումը և Մասնակիցը նվազագույն գնային առաջարկ ներկայացրած չի եղել և հետևաբար անտրամաբանական կլիներ ընթացակարգի հետագա մասնակցությունից հրաժարվելը, իսկ շտկված փաստաթղթերի՝ ոչ ժամանակին ներկայացումը պայմանավորված է եղել գնահատող հանձնաժողովի անգործությամբ և «ԲԻ ԷԼ» ՍՊ ընկերության համապատասխան փաստաթղթերը ներկայացնող մասնագետի անաշխատունակությամբ:

Պարոն Ներսիսյան ներկայացնում եմք «ԲԻ ԷԼ» ՍՊ ընկերության դիրքորոշումը կից նյութերով»:

«ԲԻ ԷԼ» ՍՊԸ-ի տնօրենը և ներկայացուցիչը, պատշաճ ծանուցված լինելով ԱՅ-ՆԳ-2022/218 ընթացակարգի շրջանակներում 03.06.2022թ. ժամը 12:25-ին հրավիրված նիստի վերաբերյալ, մասնակցել են նիստին և պնդել վերը շարադրված դիրքորոշումը:

3. ՀՀ պաշտպանության նախարարության կողմից ներկայացված փաստարկները և դիրքորոշումը.

ՀՀ պաշտպանության նախարարությունը, ՀՀ ֆինանսների նախարարությանն ուղղված 30.05.2022թ. թիվ ՊՆ/02/2575-2022 գրությամբ, հայտնել է հետևյալը.

«Հայտնում եմ, որ ՀՀ պաշտպանության նախարարության կարիքների համար աշխատանքների ձեռքբերման նպատակով կազմակերպված «ՀՀ ՊՆ-ԳՀԱՇՁԲ-22-8/1»

ծածագրով գնման ընթացակարգին (այսուհետ՝ Ընթացակարգ), ի թիվս այլ մասնակիցների հայտ է ներկայացրել նաև «ԲԻ ԷԼ» ՍՊԸ-ն (այսուհետ՝ Մասնակից):

Հայտերի գնահատման նիստում գնահատող հանձնաժողովի կողմից Մասնակցի ներկայացրած հայտում արձանագրվել է անհամապատասխանություններ՝ հայտում բացակայում է վերոնշյալ ընթացակարգի հրավերով նախատեսված Հավելված 1-ը և այդ հավելվածում կայքէջի հղման բացակայության դեպքում նաև հրավերով նախատեսված իրական շահառուների վերաբերյալ հայտարարագիրը՝ Հավելված 1.3-ը և եթե կազմակերպությունը հանդիսանում է ՀՀ ռեզիդենտ կազմակերպություն, ապա հայտով ներկայացված բոլոր փաստաթղթերը պետք է հաստատված լինեն էլեկտրոնային թվային ստորագրությամբ, համաձայն ՀՀ կառավարության 04.05.2017թ. N 526-Ն որոշման 32-րդ կետի 11-րդ ենթակետի և վերոնշյալ ընթացակարգի հրավերի 8.18-կետի: Ուստի հիմք ընդունելով ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 41-րդ կետը՝ գնահատող հանձնաժողովը մեկ աշխատանքային օրով կասեցրել է հայտերի գնահատման նիստը և 24.05.2022թ. ծանուցել վերոնշյալ մասնակցին սահմանված կարգով մեկ աշխատանքային օրվա ընթացքում շտկել արձանագրված անհամապատասխանությունները: Սահմանված ժամկետում մասնակիցը չի շտկել արձանագրված անհամապատասխանությունները և 26.05.2022թ. կայացած նիստում գնահատող հանձնաժողովը, հիմք ընդունելով ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 42-րդ կետը, մերժել է «ԲԻ ԷԼ» ՍՊԸ-ի հայտը:

Գնումների գործընթացին մասնակցելու իրավունք չունեցող մասնակիցների ցուցակում ներառելու պաշտոնական ընթացակարգ նախաձեռնելու համար կից ներկայացվում են Մասնակցի վերաբերյալ անհրաժեշտ փաստաթղթերը»:

Պատվիրատուն, պատշաճ ծանուցված լինելով ՍՑ-ՆԳ-2022/218 ընթացակարգի շրջանակներում 03.06.2022թ. ժամը 12:25-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

4. ՍՑ-ՆԳ-2022/218 ընթացակարգի քննության համար էական նշանակություն ունեցող փաստերը.

ՍՑ-ՆԳ-2022/218 ընթացակարգի քննության համար էական նշանակություն ունեն հետևյալ փաստերը.

1. ՀՀ պաշտպանության նախարարության կարիքների համար հայտարարվել է «ՀՀ ՊՆ-ԳՀԱՇՁԲ-22-8/1» ծածկագրով գնանշման հարցման ընթացակարգ (հետայսու նաև՝ Ընթացակարգ), որին մասնակցության հայտ է ներկայացրել «ԲԻ ԷԼ» ՍՊԸ-ն:

2. Ընթացակարգի գնահատող հանձնաժողովի 24.05.2022թ. նիստի թիվ 3 արձանագրության համաձայն՝ գնահատող հանձնաժողովն արձանագրել է, որ «ԲԻ ԷԼ» ՍՊԸ-ի կողմից ներկայացված հայտում բացակայում է վերոնշյալ ընթացակարգի հրավերով նախատեսված Հավելված 1-ը և այդ հավելվածում կայքէջի հղման բացակայության դեպքում նաև հրավերով նախատեսված իրական շահառուների վերաբերյալ հայտարարագիրը՝ Հավելված 1.3-ը, և եթե կազմակերպությունը հանդիսանում է ՀՀ ռեզիդենտ կազմակերպություն, ապա հայտով ներկայացված բոլոր փաստաթղթերը պետք է հաստատված լինեն էլեկտրոնային թվային ստորագրությամբ, համաձայն ՀՀ կառավարության 04.05.2017թ. N 526-Ն որոշման 32-րդ կետի 11-րդ ենթակետի և վերոնշյալ ընթացակարգի հրավերի 8.18-կետի:

3. Ընթացակարգի գնահատող հանձնաժողովը նույն արձանագրությամբ որոշում է կայացրել նիստը մեկ աշխատանքային օրով կասեցնելու վերաբերյալ՝ Ընկերությանն առաջարկելով ծանուցումը ստանալուց հետո մեկ աշխատանքային օրվա ընթացքում շտկել անհամապատասխանությունները:

4. Ընթացակարգի գնահատող հանձնաժողովի քարտուղարը Armeps էլեկտրոնային գնումների համակարգի միջոցով 24.05.2022թ. ծանուցել է Ընկերությանն արձանագրված անհամապատասխանությունները շտկելու վերաբերյալ:

5. Ընթացակարգի գնահատող հանձնաժողովի նույն արձանագրության համաձայն՝ գնահատող հանձնաժողովը 26.05.2022թ. հրավիրված նիստի ընթացքում արձանագրել է, որ «ԲԻ ԷԼ» ՍՊԸ-ի կողմից արձանագրված անհամապատասխանությունները չեն շտկվել և որոշում կայացրել Ընկերության հայտը մերժելու վերաբերյալ:

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով ՀՀ ֆինանսների նախարարության 31.05.2022թ. թիվ 26/26-1/9987-2022 գրությունը, ՀՀ պաշտպանության նախարարության 30.05.2022թ. թիվ ՊՆ/02/2575-2022

գրությունը՝ կից փաստաթղթերով, ինչպես նաև Ընկերության դիրքորոշումը՝ կից փաստաթղթերով, հայտնում եմ հետևյալը.

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագրի կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Օրենքի 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

ՀՀ կառավարության 2017 թվականի մայիսի 4-ի թիվ 526-Ն որոշմամբ հաստատված «Գնումների գործընթացի կազմակերպման մասին» կարգի (հետայսու նաև՝ Կարգ) 32-րդ կետի 11-րդ ենթակետի համաձայն՝ էլեկտրոնային եղանակով ծանուցումներն իրականացվում են տեղեկություններն էլեկտրոնային փոստին ուղարկվելու միջոցով,

բացառությամբ պետական գաղտնիք պարունակող գնումների, որի ժամանակ ծանուցումներն իրականացվում են թղթային եղանակով: Հրավերով և հայտով նախատեսվում են պատվիրատուի և մասնակցի էլեկտրոնային փոստի հասցեները: Տեղեկությունների (փաստաթղթերի) էլեկտրոնային եղանակով փոխանակման դեպքում դրանք ուղարկողը տեղեկությունները (փաստաթղթերը) հաստատում է էլեկտրոնային թվային ստորագրությամբ, իսկ հավաստագիրը՝ զետեղված «Նույնականացման քարտերի մասին» Հայաստանի Հանրապետության օրենքով սահմանված կարգով տրամադրված նույնականացման քարտում, կամ տեղեկությունները (փաստաթղթերը) ուղարկում է հաստատված բնօրինակ փաստաթղթից արտատպված (սկանավորված) տարբերակով: Գնման ընթացակարգն էլեկտրոնային գնումների համակարգի միջոցով կազմակերպված լինելու դեպքում Հայաստանի Հանրապետության ռեզիդենտ հանդիսացող մասնակիցները հայտում ներառվող՝ իրենց կողմից հաստատվող փաստաթղթերը հաստատում են էլեկտրոնային թվային ստորագրությամբ, իսկ Հայաստանի Հանրապետության ռեզիդենտ չհանդիսացող մասնակիցները՝ այդ փաստաթղթերը ներկայացնում են հաստատված բնօրինակ փաստաթղթից արտատպված (սկանավորված) տարբերակով:

Կարգի 40-րդ կետի 5-րդ ենթակետով սահմանվում է, որ հայտերի բացման և գնահատման նիստում հանձնաժողովը հրավերի պահանջների նկատմամբ բավարար գնահատված հայտեր ներկայացրած մասնակիցներից որոշում և հայտարարում է ընտրված և հաջորդաբար տեղեր զբաղեցրած մասնակիցներին: Ապրանքների գնման դեպքում հանձնաժողովը գնահատում է նաև ներկայացված ապրանքի ամբողջական նկարագրերի համապատասխանությունը հրավերի պահանջներին:

Կարգի 41-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ ներառյալ այն դեպքերը, երբ հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը: Եթե անհամապատասխանությունն արձանագրվել է ՀՀ պետական եկամուտների կոմիտեից ստացված տեղեկատվության հիման վրա, ապա մասնակցին ուղարկվող ծանուցմանը

կցվում է նաև կոմիտեից ստացված տեղեկատվության բնօրինակից սկանավորված տարբերակը: Մասնակցին ուղարկվող ծանուցման մեջ մանրամասն նկարագրվում են հայտնաբերված անհամապատասխանությունները:

Կարգի 42-րդ կետի համաձայն՝ եթե սույն կարգի 41-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա նրա հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է, ներառյալ եթե մասնակիցը սույն կարգի 32-րդ կետի 1-ին մասի «դ» պարբերությամբ սահմանված ժամկետում չի ներկայացնում հայտի ապահովման բնօրինակը, իսկ ընտրված մասնակից է ճանաչվում հաջորդող տեղ զբաղեցրած մասնակիցը:

Այսպես, ՀՀ պաշտպանության նախարարության կարիքների համար հայտարարվել է «ՀՀ ՊՆ-ԳՀԱՇԶԲ-22-8/1» ծածկագրով գնանշման հարցման ընթացակարգ, որին մասնակցության հայտ է ներկայացրել «ԲԻ ԷԼ» ՍՊԸ-ն:

Ընթացակարգի գնահատող հանձնաժողովի 24.05.2022թ. նիստի թիվ 3 արձանագրության համաձայն՝ գնահատող հանձնաժողովն արձանագրել է, որ «ԲԻ ԷԼ» ՍՊԸ-ի կողմից ներկայացված հայտում բացակայում է վերոնշյալ ընթացակարգի հրավերով նախատեսված Հավելված 1-ը և այդ հավելվածում կայքէջի հղման բացակայության դեպքում նաև հրավերով նախատեսված իրական շահառուների վերաբերյալ հայտարարագիրը՝ Հավելված 1.3-ը, և եթե կազմակերպությունը հանդիսանում է ՀՀ ռեզիդենտ կազմակերպություն, ապա հայտով ներկայացված բոլոր փաստաթղթերը պետք է հաստատված լինեն էլեկտրոնային թվային ստորագրությամբ, համաձայն ՀՀ կառավարության 04.05.2017թ. N 526-Ն որոշման 32-րդ կետի 11-րդ ենթակետի և վերոնշյալ ընթացակարգի հրավերի 8.18-կետի:

Ընթացակարգի գնահատող հանձնաժողովը նույն արձանագրությամբ որոշում է կայացրել նիստը մեկ աշխատանքային օրով կասեցնելու վերաբերյալ՝ Ընկերությանն առաջարկելով ծանուցումը ստանալուց հետո մեկ աշխատանքային օրվա ընթացքում շտկել անհամապատասխանությունները:

Ընթացակարգի գնահատող հանձնաժողովի քարտուղարը Armeps էլեկտրոնային գնումների համակարգի միջոցով 24.05.2022թ. ծանուցել է Ընկերությանն արձանագրված անհամապատասխանությունները շտկելու վերաբերյալ:

Ընթացակարգի գնահատող հանձնաժողովի նույն արձանագրության համաձայն՝ գնահատող հանձնաժողովը 26.05.2022թ. հրավիրված նիստի ընթացքում արձանագրել է,

որ «Բի ԷԼ» ՍՊԸ-ի կողմից արձանագրված անհամապատասխանությունները չեն շտկվել և որոշում կայացրել Ընկերության հայտը մերժելու վերաբերյալ:

Ընկերությունը ներկայացված դիրքորոշմամբ հայտնել է, որ 2022 թվականի մայիսի 24-ին ժամը 16:25-ին armeps համակարգի ոչ ավտոմատ ծանուցումով «Բի ԷԼ» ՍՊ ընկերության tender.22.at@gmail.com էլ. հասցեին ներկայացվել է անհամապատասխանության շտկման ծանուցում, որը «Բի ԷԼ» ՍՊ ընկերության համապատասխան փաստաթղթերը ներկայացնող մասնագետի՝ Անի Թաշյանի անաշխատունակության մեջ գտնվելու հանգամանքով պայմանավորված ներկայացվել է սահմանված ժամկետից ուշ:

Ի հավաստումն վերոգրյալի Ընկերությունը ներկայացրել է Անի Թաշյանի անաշխատունակության թերթիկը, տրված 24.05.2022թ. (սերիա՝ BB N 051767, սկիզբը՝ 24.05.2022թ., վերջը՝ 27.05.2022թ.), ինչպես նաև քաղվածք մեծահասակի ամբուլատոր բժշկական քարտից:

Այսպիսով՝ արձանագրում եմ, որ Ընկերության կողմից գնման գործընթացի շրջանակում ստանձնած պարտավորության խախտումը, այն է՝ սահմանված ժամկետում՝ 24.05.2022թ. ծանուցված լինելու պայմաններում 1 աշխատանքային օրվա ընթացքում արձանագրված ահնահամապատասխանությունները չշտկելը պայմանավորված է եղել «Բի ԷԼ» ՍՊ ընկերության համապատասխան փաստաթղթերը ներկայացնող մասնագետի՝ Անի Թաշյանի անաշխատունակության մեջ գտնվելու հանգամանքով:

Վերոգրյալով պայմանավորված՝ գտնում եմ, որ Ընկերության վերը շարադրված հանգամանքերում դրսևորած վարքագիծը չի կարող հանգեցնել «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված պատասխանավորության, քանի որ «Բի ԷԼ» ՍՊԸ-ն նման պայմաններում օբյեկտիվորեն իր կամքից անկախ պատճառներով զրկված է եղել սահմանված ժամկետում ահնահամապատասխանությունները շտկելու հնարավորությունից:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության ֆինանսների նախարարության 31.05.2022թ. թիվ 26/26-1/9987-2022 գրությամբ «Բի ԷԼ» ՍՊԸ-ին գնումների գործընթացին մասնակցելու

իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**Գնումների հետ կապված
բողոքներ քննող անձ՝**



ԳՐԻԳՈՐ ՆԵՐՍԻՍՅԱՆ